

PSE-EE. Sestaoko alkateak ukatu egin du enpresaburuen dirua jaso eta kargua bere mesederako erabili duela

Egotzi dizkioten estortsio kasuak ikertzeko eskatu dio Callejak PSEri

Alkatearen jokaera jasotzen duen txostena ustez filtratu zuen pertsonak dimisioa eman du

Erredakzioa | **DONOSTIA**

Segundo Calleja Sestaoko alkateak ustez enpresaburuei egingako estortsio kasuen ikerketa hasteko eskatu dio Calleja berak bere alderdiari. Horrekin, bere jokabidea zalantzan jartzen duten informazio guztiak uxatu nahi ditu PSE-EEko alkateak.

Prentsari ezkutuan emandako Sestaoko PSE-EEren txosten baten arabera, Callejak presioa egin zien Bizkaiko Labe Garaie-tako *pastila* eremuan lantegiak dituzten enpresaburuei dirua eman ziezaioten. Diru horren ordainez, ez lituzke itxiko eremu horretan dauden zenbait lantegi. Informazio batzuen

arabera, Labe Garaiak zeuden eremuan zenbait enpresa kokatu dira azken urteetan udal arauditik kanpo.

Diruaren helburua

Txostenaren arabera, enpresaburuek «zerga modura» 150.000 eta 500.000 pezeta arteko diru kopuruak eman zizkieten zuzenean alkateari edo haren gertukoei. Enpresaburuek uste zuten diru hori kultura eta kirol arloko elkarreentzatzela. Baina elkarte horietako batek, *Gara* egunkariari eginiko adierazpenetan, ukatu egin zuen enpresaburuen diru laguntzarik jaso zuela. Gainera, Sestaoko PSE-EEko batzordearen arabera, diru hori Callejak



XOUSE SIMAL

Segundo Calleja Sestaoko alkatea, artxiboko irudi batean.

erabili du «intendentsia pertsonalaren eta propaganda politikoaren beharrei aurre egiteko». Jokaera hori dela eta, PSE-EEren herriko batzordeak dizi-

plinazko espediente ireki zion alkateari.

Espediente horren berri ematen duen txostena isilean eman zuelakoan, Jose Maria Naviera

SEGUNDO CALLEJA

Sestaoko alkatea

«Gezuraren eta zoritxarren gainetik herritarren interesak defendatuko ditut»

Sestaoko PSE-EEko Antolakuntza idazkariak dimisioa aurkeztu zuen herenegun. Atzo Bizkaiko Exekutibako Antolakuntza idazkari Melchor Gilek bere babesa eman zion Navierari. Haren ustez, «dimisioarekin agerian gelditu da txostenaren filtrazioan ez duela erantzukizunik izan».

Erantzukizunen bila

Segundo Callejak ukatu egin zuen enpresaburuei dirua eskatu eta estortsioa egin diela inoiz, ezta alkate kargua «bere mesederako» erabili izan duela ere. «Gezurra eta zoritxarren gainetik» herritarren interesak defendatuko dituela esan zuen.

Aldi berean, erantzukizunak eskatuko dituela jakinarazi zuen: «Ikerketak amaitzen direnean —zalantzarik gabe arrazioa emango didate—, nire zintzotasuna zalantzan jarri dutenen kontra erantzukizunak argitzeko exijituko dut».

EUSKAL PRESOK. Gizartean biltzen diren aldarrikapen batzuk kirol ekitaldi baten bitartez kaleratuko dituztela diote antolatzaileek

Preso eta errefuxiatuak etxeratzeko eskatuko dute bihar Bilbon, lehenengo herri lasterketan

Axun Erzibengoa | **DONOSTIA**

Euskal preso eta iheslariak etxeratzeko eskatzeko lehenengo herri lasterketa egingo da bihar Bilbon. Senideak-Gureak elkarteak eta Amnistia-ren Aldeko Batzordeak antolatutako proba hori, *Urratsez urrats etxera* lelopean. Bilboko Arenalean izango ditu irteera eta helmuga lasterketak. «Kirol ekitaldi baten bitartez aldarrikapen jakin batzuk kaleratzeko modua da», adierazi zion Juan Antonio Madariaga Senideak-Gureak elkarteak kideak EGUNKARIARI.

Herritar orok parte har dezakeela nabarmendu dute antolatzaileek. Proba bera hiru kategoriatan banatu dute: haurrena, 13 urte arte —beraizentzat bi kilometroko zirkuitua prestatu dute—; seniorrak, 13tik 39 urtera bitartekoak, eta beterranoak handik aurrerakoak. Azken bi kategoria horietan sartzen direnek 10 kilometroko ibilbidea egin beharko dute. Hala ere, antolatzaileek probaren elkartasun zentzua nabarmendu dute eta 10

DATUAK

Lekua: Bilboko Arenala
Ordua: Haurrak 10:00etan eta helduak 10:30ean.

Distantzia: Haurrentzako bi kilometroko zirkuitua eta helduentzat 10ekoa.

Ibilbidea: Helduenak: Arenala, Askao, Ribera, Arenala, Botika zaharra, Euskalduna zubia, Gran Via, Deustu zubia, Abandoibarra, Ripa, Arenala.

Izen ematea: Lasterketa hasi baino ordu laurden lehenago arte. Helduek 800 pezeta ordaindu behar dute.

Sariak: Hiru lehenengoentzat garaikurrak, eta opariak parte-hartzaile guztientzat.

kilometroak ez egin arren, parte hartu nahi duten guztiei bertan izateko deia egin diete.

Aldarrikapenak gizarteko esparru guztietara heltzen direnez, ekimenak ere esparru guztietan antolatzeari normala irizti zion Madariagak. Jagoba

Terrones Amnistiaren Aldeko Batzordeetako kidea ere ildo beretik mintzatu zen. «Lasterketa hori kirol manifestazio bat da euskal preso politiko eta iheslariak pairatzen duten errealitatea eta herri honek gatazka konpontzeko behar duen prozesu demokratikoaren aldarrikapena kaleetatik zabaltzeko». Aldarrikapen horiek zabaltzeko manifestazio nazionalak bezain garrantzitsuak jo zituen herrietako mus txapelketak, antzerkiak eta abar. Euskal Herriak bere etorkizuna erabaki dezan martxan jartzea beharrezkoa jo zuen.

Parte-hartzaile gehienak herritarrek izango dira, baina haien artean korrikalari ezagun batzuk ere izango dira: Javi Castro, Patxi Ros edo Jone Etxebarria, esaterako.

Lasterketaren amaieran jai giroa nagusituko da Arenalean, eta 14:30ean bertso bazkaria izango da Bilboko Alde Zaharreko Herriko Tabernan, Aritz Lopategi, Xabier Arriaga eta Onintza Enbeitarekin.



Herri lasterketaren kartela jartzen Indautxuko taberna batean.

PATXI ROS

Korrikalaria, Sopelako proba nudistaren antolatzailea

«Toki guztietan kaleratu behar da aldarrikapena»

«Presoak Euskal Herrian egon daitezela nahi dut, eta gainera uste dut beharrezkoa dela hala izatea. Aldarrikapen hori edozein lekutan egitea egokia da niretzat, eta baita biharko lasterketan ere, presoak Euskal Herrian izateko nahi hori toki guztietan kaleratu behar dugu, horregatik parte hartuko dut».

JONE ETXEBARRIA

Triatloilari ohia

«Gure arazoei heltzeko beste modu bat da»

«Kirolak arlo askotarako balio dezake, eta bat da arlo errebin-dikatiboa. Euskal Herriko arazoei heltzeko modu asko daude, eta bat da gure iritzia ahal den modu eta toki guztietan ematea. Kirol aldetik ere laguntza bat eskaini badezakegu hori ere positiboa izan daiteke, eta preso eta errefuxiatuak etxeratzeko modu bat da».